

Y CABINET DYDD MAWRTH, 13 MAI 2025

Yn bresennol-

Y Cynghorwyr: Nia Wyn Jeffreys, Dilwyn Morgan, Paul John Rowlinson, Menna Trenholme, June Jones, R Medwyn Hughes, Dewi Jones, Huw Wyn Jones a Llio Elenid Owen

Hefyd yn bresennol-

Dafydd Gibbard (Prif Weithredwr), Geraint Owen (Cyfarwyddwr Corfforaethol), Dylan Owen, (Cyfarwyddwr Statudol Gwasanaethau Cymdeithasol), Iwan Evans (Swyddog Monitro), Rachel Jones (Arweinydd Tîm Gofal Plant a Chwarae), Carys Fon Williams (Pennaeth Tai ac Eiddo), Dewi Morgan (Pennaeth Cyllid), Ffion Madog Evans (Pennaeth Cyllid Cynorthwyol), Rhodri Jones (Arweinydd Tîm Democratiaeth), Ffion Mai Jones (Arweinydd Tîm Cefnogaeth Weithredol) ac Iwan Edwards (Swyddog Gwasanaethau Democratiaeth).

1. YMDDIHEURIADAU

Derbyniwyd ymddiheuriad gan y Cyngorydd Craig ab Iago.

2. DATGAN BUDDIANT PERSONOL

Ni dderbyniwyd unrhyw ddatgan buddiant.

3. MATERION BRYS

Nid oedd unrhyw fater brys.

4. MATERION YN CODI O DROSOLWG A CHRAFFU

Nid oedd unrhyw fater yn codi o drosolwg a chraffu.

5. COFNODION CYFARFOD A GYNHALIWDYD AR 08 EBRILL

Derbyniwyd cofnodion y cyfarfodydd a gynhaliwyd ar 8 Ebrill 2025 fel rhai cywir.

6. YMESTYN CYNLLUN DECHRAU'N DEG

Cyflwynwyd yr adroddiad gan Cyng. Menna Trenholme.

PENDERFYNIAD

- Derbyn cynnig grant i ehangu Rhaglen Dechrau'n Deg yn y sir drwy
 - ymestyn y cynllun llawn i weddill ardal Penygroes yn sgil gostyngiad yn y niferoedd cymwys i'r rhaglen bresennol
 - ymestyn yr elfen ofal plant i ardaloedd ychwanegol – Cam 3
- Cymeradwyo'r Pennaeth Plant, mewn ymgynghoriad gyda'r Pennaeth

Cyllid i gyflwyno achosion busnes a derbyn cynigion grant ar gyfer y Rhaglen Gyfalaf Gofal plant a'r blynyddoedd cynnar.

TRAFODAETH

Cyflwynwyd adroddiad gan yr aelod Cabinet Plant a Chefnogi Teuluoedd a oedd yn rhoi trosolwg ar y cynnig i ymestyn y Cynllun Dechrau'n Deg. Nodwyd fod yr adroddiad yn cynnwys ymestyn y cynllun Dechrau'n Deg yn llawn i weddill ardal Penygroes yn sgil gostyngiad yn y niferoedd cymwys i'r rhaglen bresennol ac i ymestyn yr elfen ofal plant i ardaloedd ychwanegol.

Esboniwyd fod y rhaglen Dechrau'n Deg eisoes ar gael mewn saith cymuned yng Ngwynedd. Nodwyd fod y gwasanaeth wedi rhoi cam cyntaf ehangu ar y gwaith mewn rhannau o Dregarth, Bethesda a Blaenau Ffestiniog. Adroddwyd fod ardal newydd wedi'i ychwanegu yn 2023, sef Deiniolen. Mynegwyd fod y prosiect yn dal i wynebu gostyngiad ac yn dilyn gwaith dadansoddi o'r ardaloedd mwyaf difreintiedig esboniwyd mai ymestyn y gwasanaeth i weddill Penygroes byddai'r cam gorau.

O ran camau 2 a 3, adroddwyd bod cam 2 wedi bod yn weithredol ers 2023 ac yn gwasanaethu wyth ardal LSOA. Tynnwyd sylw at yr heriau o fewn y sector megis diffyg darpariaeth mewn ardaloedd gwledig, cynladwyedd y Sector Gofal Plant a chynnydd mewn costau staffio. Nodwyd y byddai llwyddiant y camau nesaf yn ddibynnol ar gydweithio agos rhwng y gwasanaethau blynyddoedd cynnar, darparwyr lleol a chyllid gan Lywodraeth Cymru.

Nodwyd fod y Llywodraeth wedi cyhoeddi'r trydydd cam o ehangu Dechrau'n Deg, gan eto ei gyfyngu i ariannu'r elfen gofal plant yn unig. Eglurwyd y bydd y cynllun yn targedu 147 o blant 2 oed ychwanegol yn ystod 2025 mewn mwy o ardaloedd yng Ngwynedd. Eglurwyd fod ardaloedd ar gyfer 2025 wedi'i adnabod.

Esboniwyd fod Gwasanaeth Blynyddoedd Cynnar yn cydweithio gyda'r adan Dai ac Addysg ar brosiectau cyfalaf mawr yn Nhywyn, Penygroes, Deiniolen, Bangor a Cricieth (cyfanswm gwariant cyfalaf o oddeutu £3.5miliwn) sy'n fuddsoddiad gwych i blant yr ardaloedd hynny. Adroddwyd y byddai manteisio ar y ddwy raglen blynyddoedd cynnar yma yn cyfrannu tuag at feysydd Blaenoriaeth "Gwynedd Yfory" a "Gwynedd Gymraeg" yng Nghynllun y Cyngor drwy roi'r cychwyn gorau posibl mewn bywyd i blant.

Sylwadau'n codi o'r drafodaeth:

- Diolchwyd a chymeradwywyd y gwaith pwysig sydd yn cael ei wneud ond mynegwyd pryder am yr heriau sydd yn wynebu darparu'r gwasanaeth yma. Amlygwyd ei fod yn fwy nag gwasanaeth gwarchod plant ac yn rhan bwysig o addysg y plant. Pwysleisiwyd ei fod yn bwysig fod y Cyngor a'r Cabinet yn rhoi cymaint o gymorth a phosib i sicrhau fod y gwaith yn parhau.
- Croesawyd y cynllun gan esbonio fod yr Aelod wedi dod ar draws enghreifftiau yn ei ardal ei hun gyda rhai plant yn cael darpariaeth a rhai eraill ddim. Mynegwyd ei siomedigaeth gyda hyn a nodwyd ei fod eisiau gweld y rhaglen yn parhau i dyfu fel y bod y Cyngor medru cynnig gofal

plant am ddim i holl blant y sir. Tynnwyd sylw at ardaloedd ble argymhellir ehangu yn ystod 2025-26 a gofynnwyd a oes amserlen i'r cynllun yma. Nodwyd nad oed modd rhoi llawer o eglurdeb ar hyn o bryd gan ei bod yn disgwyl am ymateb gan y Llywodraeth.

7. CYNLLUN GWEITHREDU TAI

Cyflwynwyd yr adroddiad gan Cyng. Paul Rowlinson.

PENDERFYNIAD

1. Ymestyn cyfnod y Cynllun Gweithredu Tai am ddwy flynedd bellach hyd ddiwedd y flwyddyn ariannol 2028/29.
2. Ymrwymo'r swm blynyddol arferol o £6m o'r gronfa Premiwm Treth Cyngor ar gyfer ariannu'r ddwy flynedd ychwanegol.

TRAFODAETH

Cyflwynwyd yr adroddiad gan yr Aelod Cabinet Tai ac Eiddo a oedd yn rhoi diweddariad ar y Cynllun Gweithredu Tai. Gofynnwyd i ymestyn cyfnod y Cynllun hyd ddiwedd y flwyddyn ariannol 2028-29. Nodwyd fod angen i'r Cabinet wneud penderfyniad i alluogi'r Adran Tai ac Eiddo i flaengynllunio er mwyn sicrhau bod prosiectau a chynlluniau allweddol yn cael eu gwireddu yn amserol ac i'w llawn botensial.

Rhoddwyd trosolwg o gefndir y cynllun gan nodi fod y Cyngor Llawn wedi penderfynu defnyddio canran o'r arian a dderbynnir o godi premiwm ail gartrefi i ddarparu tai ar gyfer pobl ifanc yn eu cymunedau. Er mwyn rhoi hyn ar waith, eglurwyd fod y Cynllun Gweithredu Tai wedi ei gymeradwyo gan y Cabinet i gynnwys 33 o brosiectau ar draws pum maes allweddol er mwyn sicrhau bod gan bobl Gwynedd gartref addas, fforddiadwy ac o safon.

Nodwyd fod newidiadau sylweddol wedi bod i sefyllfa tai yng Ngwynedd dros y blynyddoedd diwethaf, yn enwedig yn sgil pandemig Covid-19 a Brexit ac felly cymerwyd y cyfle i adolygu'r Cynllun, gan gymryd mantais o gyfleoedd newydd i ehangu a helpu hyd yn oed mwy o drigolion y sir gyda'u sefyllfa dai.

Ar y cyfan, adroddwyd fod cynnydd da wedi'i wneud ar y Cynllun hyd yma gyda bron i £70m wedi'i fuddsoddi i helpu pobl Gwynedd gyda'u sefyllfa dai. Nodwyd y gall cyfleoedd newydd godi yn ystod y cynllun, gan fod amgylchiadau cenedlaethol yn newid yn barhaus. Eglurwyd y bydd yr hyblygrwydd a ganiatawyd eisoes i amrywio'r union ddyraniad ar gyfer prosiectau unigol yn galluogi i'r adran i weithredu'n rhagweithiol yn wyneb unrhyw newidiadau yn y farchnad dai dros amser.

Sylwadau'n codi o'r drafodaeth:

- Amlygwyd cefnogaeth i'r Premiwm ar dai gwag, gan holi os yw'n bosib codi'r Premiwm uwch ar dai sydd yn wag tymor hir. Mewn ymateb,

cytunwyd gyda'r sylwadau a nodwyd fod y premiwm fel y mae ar hyn o bryd yn addas. Er hyn, nodwyd y dylid rhoi ystyriaeth i godi'r premiwm ar gyfer tai sydd wedi bod yn wag ers tymor hir iawn.

- Codwyd pryder am gyflwr tai sector mân-ddaliadau sydd gan y Cyngor.. Mewn ymateb, eglurwyd fod y Stad Fân-ddaliadau yn cynnig cartrefi i 39 o deuluoedd yr ardaloedd yng Ngwynedd ar hyn o bryd. Nodwyd bod cyfrifoldeb ar y Cyngor i sicrhau fod y tai yn cyrraedd y gofynion o ran cyflwr ac iechyd a diogelwch. Esboniwyd nad oes buddsoddiad wedi bod yn y rhan helaeth o'r tai sydd ynghlwm y mân-ddaliadau. Ac o ganlyniad wedi arwain at ddirywiad yn safon y tai sydd wedyn wedi creu cynnydd yn y costau cynnal a chadw. Nodwyd mai'r bwriad wrth symud ymlaen yw gweithio gyda'r tenantiaid i godi safonau tai gan sicrhau cysondeb.

8. CYFRIFON TERFYNOL 2024/25 - ALLDRO REFENIW

Cyflwynwyd yr adroddiad gan Cyng. Huw Wyn Jones.

PENDERFYNIAD

Derbyn yr adroddiad ac ystyried y sefyllfa ariannol derfynol adrannau'r Cyngor am 2024/25:

	Colofn A	Colofn B	Colofn C	Colofn CH	Colofn D
	Gor/(Tan) Wariant Gros 2024/25	Addasiadau a Argymhellir			Gor / (Tan) Wariant Addasedig 2024/25
	£ '000	£ '000	£ '000	£ '000	£ '000
Oedolion, Iechyd a Llesiant	857			(757)	100
Plant a Theuluoedd	3,805			(3,705)	100
Gwasanaeth Busnes	a(15)	15			0
Chomisiynu Gofal Addysg	(191)	191			0
Economi a Chymuned	281		(281)		0
Priffyrdd, Peirianeg ac YGC	656			(556)	100
Amgylchedd	1,349		(1,100)	(149)	100
Tai ac Eiddo	(3)	3			0
Tîm Rheoli Corfforaethol	a(48)	48			0
Chyfreithiol					
Gwasanaethau Corfforaethol	(42)	42			0

Cyllid	(5)	5	0
--------	-----	---	---

Gan nodi bod gorwariant sylweddol gan yr Adran Oedolion, Iechyd a Llesiant, Adran Plant a Theuluoedd, Adran Prifffyrdd, Peirianeg ac YGC, a'r Adran Amgylchedd yn 2024/25 (Gweler colofn A yn y tabl uchod). Cymeradwywyd trosglwyddiadau ariannol canlynol (a eglurwyd yn Atodiad 2 yr adroddiad) -

- Yn unol â phenderfyniad Cabinet 21 Ionawr 2025, peidio caniatáu i adrannau gario unrhyw danwariant i'r flwyddyn ariannol nesaf drwy eithrio cymal 16.3.1.(C) o'r Rheoliadau Ariannol (Gweler colofn B yn y tabl uchod).
- Cadarnhau'r cymorth ariannol o £281k uwchlaw'r taliad cytundebol i Gwmni Byw'n Iach, a defnyddio £1.1 miliwn o gronfa Adennill Enillion Cyfrannol Parc Adfer i gyllido'r gorwariant yn y maes Gwastraff (Gweler colofn C yn y tabl uchod).
- Yr adrannau sydd yn gorwario i dderbyn cymorth ariannol un tro gan gyfyngu lefel y gorwariant sydd i'w gario ymlaen gan yr Adran i £100k (Gweler colofn CH yn y tabl uchod).
- Ar gyllidebau Corfforaethol:
- defnyddio (£5.144 miliwn) o'r tanwariant ar gyllidebau corfforaethol i gynorthwyo'r adrannau sydd wedi gorwario yn 2024/25. gweddill y tanwariant o (£1.548 miliwn) ar gyllidebau Corfforaethol i'w drosglwyddo i'r Gronfa Trawsffurfio, i'w ddefnyddio ar gyfer blaenoriaethau'r Cyngor.

Cymeradwywyd symiau i'w cario 'mlaen (y golofn "Gor/(Tan) Wariant Addasedig" yng ngholofn D uchod ac yn Atodiad 1).

Cymeradwywyd trosglwyddiadau ariannol o gronfeydd penodol fel yr amlinellir yn Atodiad 3 yn dilyn adolygiad o'r cronfeydd:

- cynaeafu £1.275 miliwn o amrywiol gronfeydd a'i drosglwyddo i'r Gronfa Trawsffurfio.
- Dad-ymrwymo £375k o gynlluniau hanesyddol neu rai heb ymrwymadau yn y Gronfa Trawsffurfio.
- Symud £2.5 miliwn o gronfa Cynorthwyo'r Strategaeth Ariannol i'r Gronfa Trawsffurfio fel eu bod ar gael ar gyfer blaenoriaethau'r Cyngor a chyllido bidiau un tro i'r dyfodol.

TRAFODAETH

Cyflwynwyd yr adroddiad a oedd yn manylu ar sefyllfa ariannol derfynol adrannau'r Cyngor gan nodi'r rhesymau dros y gorwariant neu danwariant. Amlygwyd fod y sefyllfa wedi gwella ers adolygiad Awst a Tachwedd. Nodwyd fod gorwariant yn parhau ym meysydd gofal all sirol yr Adran Plant a Chefnogi Teuluoedd, Gwasanaeth Derwen, Gwasanaeth Gofal Cartref a'r maes Gwastraff. Eglurwyd fod derbyniadau grant sylweddol a sefyllfa ffafriol ar nifer o gyllidebau corfforaethol yn cynorthwyo i leddfu'r sefyllfa ariannol ar gyfer y Cyngor yn ei gyfanrwydd erbyn diwedd y flwyddyn ariannol.

Tynnwyd sylw at rhai adrannau yn unigol i roi rhesymeg dros y cyllidebau.

Amlygwyd fod gorwariant o £857k gan yr Adran Oedolion yn leihad o'r rhagolygon o

£3m yn gynharach yn y flwyddyn. Eglurwyd fod hyn o ganlyniad i'r adran yn derbyn grantiau ac incwm sylweddol yn agos i ddiwedd y flwyddyn ariannol. Pwysleisiwyd fod pwysau amlwg yn parhau yn y maes Gofal Cartref, gyda chostau staffio uwch a lefelau salwch a chyfraddau oriau digyswllt yn uchel, tra bod pwysau sylweddol hefyd ar y gyllideb darparwyr gofal cartref preifat. Mynegwyd fod defnydd o staff asiantaeth yn un o'r materion yng ngofal preswyl mewnol.

Eglurwyd fod gorwariant yr Adran Plant a Chefnogi Teuluoedd yn uwch na'r hyn oedd wedi ei ragweld a'i fod bellach yn £3.8m. Eglurwyd fod hyn o ganlyniad i gynnydd yng nghostau lleoliadau all-sirol oherwydd cymhlethdodau pecynnau a defnydd cynyddol ddiweddar o leoliadau heb eu cofrestru, sy'n fwy costus. Mynegwyd fod pwysau hefyd i'w weld ar gyllideb y Gwasanaeth Derwen ac ar gefnogaeth cynlluniau cefnogol a gweithwyr maes.

O ran yr Adran Addysg nodwyd fod y maes cludiant ysgolion wedi derbyn dyraniad cyllideb ychwanegol eleni, ac o ganlyniad i hyn, derbyn grantiau ychwanegol ynghyd a chwtogi gwariant mae'r adran yn tanwario (£191k) ar ddiwedd y flwyddyn.

Eglurwyd dros y blynyddoedd diwethaf fod Cwmni Byw'n lach wedi derbyn cefnogaeth ariannol gan y Cyngor oedd uwchlaw taliad cytundebol y contract ddarparu, i'w galluogi i gynnal eu gwasanaethau. Mynegwyd fod yr angen am gefnogaeth ariannol yn parhau yn 2024/25 gyda'r swm gofynnol wedi cynyddu i £281k erbyn diwedd y flwyddyn.

Amlygwyd gorwariant yn yr Adran Prifffyrdd, Peirianeg ac YGC gan egluro o ran y maes bwrdeistrefol fod cyfuniad o ffactorau yn rheswm dros hyn, gan gynnwys pwysau ychwanegol ar gyllidebau staff glanhau strydoedd a glanhau toiledau cyhoeddus.

Pwysleisiwyd fod tueddiad blynyddol o orwariant yn y maes casglu gwastraff yn parhau ac yn gyfrifol am orwariant yr Adran Amgylchedd. Eglurwyd yn ogystal fod diffyg incwm parcio hefyd yn amlwg eleni ac wedi cynyddu erbyn diwedd y flwyddyn.

Er fod pwysau sylweddol ar y gwasanaeth llety argyfwng o fewn yr Adran Tai ac Eiddo yn parhau, mae cyllideb ychwanegol wedi ei ddyrannu o bremiwm treth cyngor, cyllideb un tro ychwanegol a grant ychwanegol gan Lywodraeth Cymru wedi cynorthwyo gyda'r pwysau ychwanegol.

Roedd ragolygon ar sefyllfa cyllidebau ysgolion yn amlygu lleihad sylweddol ym malansau ysgolion, ond yn dilyn derbyn grant gan Lywodraeth Cymru ar ddiwedd y flwyddyn, nodwyd fod lefelau'r balansau wedi eu cynnal.

Adolygwyd digonolrwydd cronfeydd penodol y Cyngor gan y Pennaeth Cyllid unwaith eto wrth gau'r cyfrifon eleni, yn unol â'r polisi a gymeradwywyd rhai blynyddoedd yn ôl. Llwyddodd yr adolygiad yma i gynaeafu £1.275 miliwn o adnoddau sydd wedi ei drosglwyddo i'r gronfa Trawsfurfio i'w ddefnyddio ar gyfer blaenoriaethau'r Cyngor.

Sylwadau'n codi o'r drafodaeth:

- Galwyd ar Lywodraeth Cymru i ail edrych ar y ffordd maent yn dyrannu eu

grantiau, gan fod derbyn grantiau munud olaf yn y flwyddyn ariannol yn ei gwneud yn anodd iawn i gynllunio yn hir dymor.

- Mynegwyd balchder fod gorwariant yr Adran Oedolion wedi lleihau yn sylweddol. Nodwyd ei bod hi'n bwysig cofio fod llawer iawn o'r arian mae'r Cyngor wedi'i derbyn yn arian un tro ac felly does dim gwarant y bydd ar gael yn y dyfodol. Gofynnwyd felly i'r Cabinet fod yn effro i'r pwysau sydd dal yna yn gyson ar yr Adran Oedolion ac i fod yn barod am hynny yn y dyfodol. Diolchwyd i staff yr Adran Gyllid am eu cefnogaeth i leihau gwariant yn sylweddol.

9. RHAGLEN GYFALAF 2024/25 - ADOLYGIAD DIWEDD BLWYDDYN (SEFYLLFA 31 MAWRTH 2025)

Cyflwynwyd yr adroddiad gan Cyng. Huw Wyn Jones

PENDERFYNIAD

Derbyn yr adroddiad ar adolygiad diwedd y flwyddyn (sefyllfa 31 Mawrth 2025) o'r rhaglen gyfalaf.

Cymeradwyo'r addasiadau canlynol i'r Gyllideb Gyfalaf a gymeradwywyd ar 7 Mawrth 2024 ac a addaswyd ar 15 Hydref 2024 a'r 21 Ionawr 2025 o safbwynt dulliau ariannu'r rhaglen (fel nodir yn rhan 3.2.3 o'r adroddiad), sef:

- cynnydd o £4,409,000 mewn defnydd o fenthycia
- cynnydd o £17,639,000 mewn defnydd o grantiau a chyfraniadau
- cynnydd o £75,000 mewn defnydd o dderbyniadau cyfalaf
- lleihad o £422,000 mewn defnydd o gyfraniadau refeniw
- lleihad o £3,898,000 mewn defnydd o'r gronfa cyfalaf
- cynnydd o £1,555,000 mewn defnydd o gronfeydd adnewyddu ac eraill.

TRAFODAETH

Cyflwynwyd yr adroddiad gan nodi mai ei brif ddiben yw i gyflwyno'r rhaglen gyfalaf ddiwygiedig, a chymeradwyo'r ffynonellau ariannu perthnasol fel rhan o drefn diwedd blwyddyn 2024/25. Amlygwyd fod £82.5m wedi ei fuddsoddi mewn cynlluniau cyfalaf, gyda 72% ohono wedi'i ariannu drwy ddenu grantiau penodol.

Ychwanegwyd fod £33.4m o wariant ychwanegol arfaethedig wedi'i ail broffilio o 2024/25 i 2025/26 a 2026/27. Nodwyd fod rhai o'r prif gynlluniau yn cynnwys £16m o Gynlluniau Ysgolion – Cymunedau Dysgu Cynaliadwy ac Eraill, a £10m o Gronfa Ffyniant Bro.

Amlygwyd ers yr adolygiad diwethaf fod y Cyngor wedi llwyddo i ddenu grantiau ychwanegol o £19.382m sydd yn cynnwys £10.613m Addasiad Cronfa Ffyniant Cyffredin gan Lywodraeth y Deyrnas Unedig a £1.8m Grant Rhaglen Gyfalaf Llety Trosiannol gan Lywodraeth Cymru.

10. EISTEDDFOD YR URDD

Cyflwynwyd yr adroddiad gan Cyng. Huw Wyn Jones

PENDERFYNIAD

Derbyn yr adroddiad ar adolygiad diwedd y flwyddyn (sefyllfa 31 Mawrth 2025) o'r rhaglen gyfalaf.

Cymeradwyo'r addasiadau canlynol i'r Gyllideb Gyfalaf a gymeradwywyd ar 7 Mawrth 2024 ac a addaswyd ar 15 Hydref 2024 a'r 21 Ionawr 2025 o safbwynt dulliau ariannu'r rhaglen (fel nodir yn rhan 3.2.3 o'r adroddiad), sef:

- cynnydd o £4,409,000 mewn defnydd o fenthycia
- cynnydd o £17,639,000 mewn defnydd o grantiau a chyfraniadau
- cynnydd o £75,000 mewn defnydd o dderbyniadau cyfalaf
- lleihad o £422,000 mewn defnydd o gyfraniadau refeniw
- lleihad o £3,898,000 mewn defnydd o'r gronfa cyfalaf
- cynnydd o £1,555,000 mewn defnydd o gronfeydd adnewyddu ac eraill.

TRAFODAETH

Cyflwynwyd yr adroddiad gan nodi mai ei brif ddiben yw i gyflwyno'r rhaglen gyfalaf ddiwygiedig, a chymeradwyo'r ffynonellau ariannu perthnasol fel rhan o drefn diwedd blwyddyn 2024/25. Amlygwyd fod £82.5m wedi ei fuddsoddi mewn cynlluniau cyfalaf, gyda 72% ohono wedi'i ariannu drwy ddenu grantiau penodol.

Ychwanegwyd fod £33.4m o wariant ychwanegol arfaethedig wedi'i ail broffilio o 2024/25 i 2025/26 a 2026/27. Nodwyd fod rhai o'r prif gynlluniau yn cynnwys £16m o Gynlluniau Ysgolion – Cymunedau Dysgu Cynaliadwy ac Eraill, a £10m o Gronfa Ffyniant Bro.

Amlygwyd ers yr adolygiad diwethaf fod y Cyngor wedi llwyddo i ddenu grantiau ychwanegol o £19.382m sydd yn cynnwys £10.613m Addasiad Cronfa Ffyniant Cyffredin gan Lywodraeth y Deyrnas Unedig a £1.8m Grant Rhaglen Gyfalaf Llety Trosiannol gan Lywodraeth Cymru.

Dechreuodd y cyfarfod am 13:00 a daeth i ben am 14:10

CADEIRYDD